

**RUKOMETNI SAVEZ
BOSNE I HERCEGOVINE**

**KODEKS
O PONAŠANJU ČLANOVA RUKOMETNOG SAVEZA BIH**

Sarajevo, 26.04.2018. godine

Na osnovu člana 35. Statuta Rukometnog saveza Bosne i Hercegovine BiH, Upravni odbor RS BiH na sjednici održanoj 26.04.2018. godine, donosi s l i j e d e ć i

KODEKS O PONAŠANJU ČLANOVA RUKOMETNOG SAVEZA BIH

Član 1.

Kodeksom o ponašanju članova Rukometnog saveza BiH (u daljem tekstu: Kodeks) regulišu se pravila ponašanja klubova, igrača u klubovima, igrača reprezentativnih selekcija RS BiH, članova stručnih štabova reprezentativnih selekcija RS BiH, sudija, delegata, članova organa i tijela, kao i ostalih rukometnih radnika u Bosni i Hercegovini.

Putem ovog Kodeksa naglašavaju se osnovna sportska načela u RSBiH, a posebno fair-play i korektno ponašanje.

Član 2.

Članovima Rukometnog saveza u ovom Kodeksu smatraju se igrači, treneri, članovi (igrači i članovi stručnih štabova) reprezentativnih selekcija RSBiH, predsjednici, direktori i ostali službenici klubova, rukometni suci, delegati, kontrolori, osobe koje rukovode takmičenjem, članovi organa i tijela RS BiH, kao i sve ostale osobe koje učestvuju u radu RSBiH na svim nivoima organizovanja RS BiH i u daljem tekstu će se tretirati kao RSBiH.

Član 3.

Bilo koja lična komunikacija koja uključuje članove RSBiH treba da bude na uljudnom i kurtoaznom nivou. Niti jedna komunikacija se ne smije koristiti za:

- Širenje neistina o osobama ili procesima
- Uključivanje drugih sa namjerom protiv interesa RSBiH
- Prikupljanje informacija koje će biti dostavljene medijima ili biti iskorištene protiv RSBiH, entitetskih saveza, klubova, službenih lica, poslovnih partnera i drugih lica koja imaju vezu sa RSBiH

Članovi RSBiH trebaju se ponašati u skladu sa načelima sportskog ponašanja, koja su zasnovana na uvažavanju sportskog protivnika, gledalaca i RSBiH, zalaganju za punu regularnost takmičenja, suzdržavanju od svih nedopuštenih radnji, afirmaciji i popularizaciji sporta, poštenju i časti, te svim ostalim oblicima ponašanja kojima se promoviše rukomet kao sport.

Članovi RSBiH obavezni su voditi računa o svom ugledu i ponašanju u svom javnom i privatnom životu, te su obavezni pridržavati se ovog Kodeksa i u situacijama koje nisu direktno vezane za rukomet.

Član 4.

Obaveze članova RSBiH

1. Svi članovi RSBiH

Svi članovi RSBiH posebno trebaju:

1. poštovati načela lojalnosti, integriteta i sportskog odnosa u skladu s načelima fair playa, što posebno uključuje obavezu suzdržavanja od svih aktivnosti koje ugrožavaju integritet RS BiH, njegovih članica i takmičenja, ili narušavaju ugled rukometnom sportu;
2. suzdržavati se od prihvaćanja poklona ili novca ili koristi bilo koje vrste koja se razumno može smatrati prekomjernim;
3. ne smiju prihvatiti mito, što znači da moraju odbiti sve poklone ili druge prednosti koje im se ponude, obećaju ili pošalju, kako bi prekršili svoju obavezu ili se nepošteno ponašali u korist treće stranke;
4. ne smiju davati mito trećoj strani niti smiju poticati druge to učine kako bi stekli prednost za sebe ili treće strane;
5. suzdržati se od pokušaja uticaja na članove organa koji donose odluke u vezi sa takmičenjem, ili druge odluke iz djelokruga rada organa i tijela RS BiH;
6. odmah obavijestiti RS BiH ukoliko im bude ponuđeno mito;
7. u javnim nastupima nije dozvoljeno iznošenje negativnih stavova, vrijeđanja ili klevetanja drugih pripadnika RSBiH, a izjave za sredstva javnog informisanja su dozvoljene samo u skladu sa internim pravilima Saveza koja se odnose na ovu oblast, tj. po odobrenju predsjednika, potpredsjednika ili generalnog sekretara, i u skladu sa aktima koji regulišu pravila komuniciranja;
8. davati sve primjedbe na suđenje, organizaciju utakmice ili rukovodstvo takmičenja samo na način predviđen propisima RS BiH, uključujući i pravo na pokretanje disciplinskog ili žalbenog postupka;
9. ne smiju sudjelovati, neposredno ili putem trećih osoba, u klađenju ili sličnim aktivnostima koje se odnose na utakmice u organizaciji RS BiH i ne smiju imati nikakav, posredan ili neposredan finansijski interes u odnosu na takve aktivnosti;
10. ostati politički neutralni u kontaktima s vladinim institucijama, nacionalnim i međunarodnim organizacijama;
11. ne smiju uvrijediti dignitet osobe ili grupe osoba putem uvredljivih, diskriminacijskih ili klevetničkih riječi ili djela, a u odnosu na nacionalnu, rasnu, kulturnu, vjersku, političku, spolnu ili bilo koju drugu pripadnost;
12. u potpunosti se pridržavati statuta, pravilnika i drugih propisa RS BiH, IHF i EHF;

13. unutar i izvan stadiona ponašati se na način koji pomaže rukometu u dobijanju povećanog poštovanja.
14. Osobe koje su povezane sa aktivnostima RSBiH ne trebaju koristiti alkohol, duhan ili slične supstance na neadekvatan način. To znači:
 - pretjerano konzumiranje alkohola, duhana ili sličnih supstanci
 - konzumiranje alkohola, duhana ili sličnih supstanci na u dvoranama
 - konzumiranje alkohola, duhana ili sličnih supstanci direktno prije ili poslije službenih aktivnosti
15. Nulta tolerancija je za sve verbalne uvrede, fizičko nasilje, rasizam i seksualno uznemiravanje.
16. Tolerancija i jednak tretman svih strana uključenih u aktivnosti RSBiH su osnova ponašanja.

2. Igrači

Igrač treba:

1. Poduzeti sve napore kako bi razvio svoje sportske sposobnosti, u odnosu na znanje, tehniku, taktiku, izdržljivost, itd;
2. Poduzeti maksimalni napor i nastojati tokom utakmice pružiti najbolju moguću igru, čak i kada je njegova ekipa u poziciji kada je željeni rezultat već ostvaren (pobjeda, kvalifikacija itd.);
3. Biti pozitivan primjer mlađim igračima;
4. Odbiti uzimanje bilo kojih sredstava koja se smatraju dopingom, kao i kontrolisati i informisati se o načinu uzimanja dopuštenih sredstava i preparata;
5. Poštovati sportske protivnike i njihove navijače;
7. Poštovati Pravila igre, odredbe i duh igre;
8. Dostojno i u duhu fair-playa prihvaćati uspjeh i neuspjeh, pobjedu i poraz;
9. Bez negodovanja prihvatiti odluke suca, i nakon utakmice ne komentarisati njihove odluke;
10. Izbjegavati riječi ili djela koja bi mogla omesti suca ili ga navesti na pogrešnu odluku
11. Ponašati se na dostojanstven način prema gledaocima i medijima, bez obzira na rezultat utakmice ili izražene stavove gledalaca ili medija;
12. Insistirati na istini i realnosti prilikom ustupanja informacija.

Igrači članovi reprezentativnih selekcija RS BiH trebaju:

1. Pravovremeno se odazvati se na pripreme i nastup pojedine reprezentacije BiH;
2. Na pripremama i nastupima pridržavati se uputa i naloga za treninge, utakmice, boravak na pripremama, upute o korištenju opreme, upute o prehrani i lijekovima, te drugih uputa izdatih od strane selektora;
3. Davati izjave za javnost, intervjuje za štampu, radio ili televiziju na način da to ne šteti RS BiH, niti rukometu u cjelini. Izjave koje se odnose na unutrašnja pitanja RSBiH, naročito o

treningu, taktici i sl, ili radu selektora ili vodstva RSBIH nisu dozvoljena i mogu se davati samo uz prethodnu suglasnost RSBIH.

4. Ispunjavati, bez novčane ili druge naknade, obaveze u smislu marketinških, sponzorski

drugih aktivnosti, a posebno:

- a) učestvovati u svim aktivnostima, nastupima, publikacijama RSBiH, u svrhu promocije RSBiH, posebno na televiziji, radiju ili štampi, kao i na javnim priredbama, podjeli autograma, odavanjima počasti, i sl. Na takvim aktivnostima igrač treba nositi sportsku opremu i odjeću koju mu na raspolaganje stavlja RSBiH;
- b) prenijeti prava na upotrebu svog lika na korištenje Savezu, a taj prijenos odnosi se na sve sadašnje i buduće tehničke medije i institucije, uključujući i multimedije (internet i sl.). To naročito vrijedi za fotografije igrača, pojedinačno ili cijele ekipe, osobito u pogledu scena iz utakmica i/ili cijelih utakmica reprezentacije, a u svrhu da Savez može ispuniti svoje obaveze iz sponzorskih ugovora. Igrači će potpisati svoju saglasnost vezanu za ove aktivnosti.

5. Poštovati sve odredbe Pravilnika o državnim reprezentacijama RSBiH, kao i druge akte i odluke nadležnih organa RSBiH, IHF i EHF.

3. Treneri

Treneri i selektori trebaju:

1. Promovisati istinske vrijednosti rukometnog sporta kako bi se pridobila podrška i entuzijazam mladih ljudi - navijača i igrača;
2. Razvijati svoje profesionalno znanje i poboljšavati ga, proučavajući rezultate naučnih istraživanja, praktičnog iskustva i profesionalnih savjeta;
3. Razmjenjivati svoje profesionalno znanje s kolegama, naročito onima mlađe generacije i posebno kada za to bude zatražen (npr. profesionalne konferencije, članci itd);
4. Štititi rukomet od negativnih utjecaja;
5. Poduzeti sve napore u smjeru razvijanja (sportskog, tehničkog, taktičkog itd.) i putem dozvoljenih sredstava ostvarivati najbolje rezultate svoje ekipe;
6. Insistirati da igrači razumiju i poštuju načela sportskog ponašanja;
7. Poštovati sportske protivnike i njihove navijače;
8. Ponašati se na dostojanstven način prema gledaocima i medijima, bez obzira na rezultat utakmice ili izražavanja stavova gledalaca ili medija;
9. Strogo insistirati na istini i realnosti prilikom ustupanja informacija;
10. Bez negodovanja prihvatati odluke suca i nakon utakmice ne komentarisati njihove odluke;
11. Izbjegavati metode treniranja koje uključuju dugoročne rizike na zdravlje ili fizički razvoj;
12. Osigurati mlađim igračima sportsko iskustvo koje će ih ohrabriti da doživotno budu vezani uz fizičke aktivnosti;
13. Ponuditi mladoj osobi i njegovoj porodici što je moguće više informacija, kako bi bili svjesni potencijalnih rizika vezanih uz postizanje maksimalnog nivoa nastupa;

14. U kontaktu s roditeljima mlađih igrača ostvariti dobar odnos i saradnju.
15. Davati izjave za javnost, intervju za štampu, radio ili televiziju na način da to ne šteti RS BiH, niti rukometu u cjelini. Izjave koje se odnose na unutrašnja pitanja RSBiH, naročito o treningu, taktici i sl, ili radu selektora ili vodstva RSBiH nisu dozvoljena i mogu se davati samo uz prethodnu suglasnost RSBiH.

4. Sudije

Sudija treba:

1. Suditi prema Pravilima rukometne igre
2. Poduzeti sve napore kako bi osigurao da je fizički i psihički spreman;
3. Biti staložen i odlučan i oduprijeti se svim utjecajima koji proizlaze iz negodovanja igrača, službenih osoba klubova ili gledatelja;
4. U svako vrijeme biti pošten i potpuno nepristrasan, bez obzira na ekipe, igrače ili službene osobe koji su uključeni u utakmicu;
5. Odbiti delegiranje na utakmici ukoliko nije fizički ili psihički spreman suditi utakmicu (zbog bolesti, povrede ili obiteljskih razloga);
6. Odbiti sve ponude pretjerane gostoljubivosti (ručkovi, noćenja, pokloni, i sl);
7. Štititi igrače od grube igre;
8. Pokazati dužno poštovanje u svojim kontaktima sa igračima;
9. Detaljno i realno ispuniti izvještaj o utakmici;
10. Suzdržati se od javnog izražavanja svih kritika službenih lica ili bilo kakvih davanja izjava u medijima, a koje se odnose na utakmicu;
11. Pomagati u razvoju mladih sudaca.

Dužnosnici i zaposlenici rukometnih saveza i klubova trebaju:

1. Odbiti sve nedopuštene ili nespportske pokušaje igrača, trenera, ostalih službenika itd. svoje ekipe (npr. korištenje nedozvoljenih lijekova ili supstanci, taktičke upute trenera kojima bi se ozlijedili igrači protivničke momčadi, i sl);
2. Promovisati etička načela;
3. Osigurati ispunjavanje obveza koje proizlaze iz ugovora s igračima, dobavljačima i drugim subjektima;

4. Odgovorno se ponašati prema svojim dužnostima i obavezama;
5. Djelovati i u javnim istupima ponašati se afirmativno prema rukometu općenito, sportskim protivnicima i rukometnim sucima, te osuđivati negativne pojave kao što su diskriminacija, navijačko nasilje i druga zabranjena i nepoželjna ponašanja;
6. Djelovati i u javnim istupima ponašati se afirmativno prema rukometu općenito, sportskim protivnicima i rukometnim sucima, te osuđivati negativne pojave kao što su diskriminacija, navijačko nasilje i druga zabranjena i nepoželjna ponašanja;

Član 5.

Korištenje društvenih mreža

Članovi RSBiH su u obavezi:

- Koristiti stvarno ime i objasniti svoju ulogu unutar RSBiH ukoliko se objavljuju informacije vezane za aktivnosti RSBiH. Naglasiti da su izneseni stavovi lični.
- Tretirati ljude i njihove stavove sa uvažavanjem čak ako se razlikuju od ličnog stava. Ne postavljati, ne dijeliti i ne „lajkati“ objave ili sadržaje koji se smatraju neprimjerenim, zastrašujućim ili uvredljivim. Ne govoriti negativne stvari o drugima u vašim objavama na društvenim mrežama, a naročito ne o članovima RSBiH.
- Da vode računa o tome da bilo šta što objave, čak i među prijateljima i bez obzira na postavke privatnosti, može biti viđeno ili podijeljeno od strane drugih ljudi, medija, igrača ili navijača.
- Da odgovaraju za svoje objave, dijeljenja ili „lajkanja“.
- Da dobiju dozvolu za objavljivanje sadržaja.
- Da čuvaju dignitet RSBiH i svih njegovih članova/članica.
- Da koriste primjeren rječnik i da ne iznose klevete na račun RSBiH i njegovih članova/članica.
- Da čuvaju i ne dijele povjerljive informacije kojima imaju pristup zbog uloge u RSBiH.

Član 6.

Povreda odredbi ovog Kodeksa predstavlja disciplinski prekršaj regulisan Disciplinskim pravilnikom RSBiH.

Osim individualne odgovornosti svakog člana RSBiH, klubovi su odgovorni za organizaciju utakmice te za incidente bilo koje prirode koji se dogode uoči, za vrijeme ili poslije utakmice.

Ukoliko članovi RSBiH koji volonterski obavljaju svoju dužnost učine prekršaj za koji je predviđena i novčana kazna, ista se izriče klubu ili drugom rukometnom subjektu, koje je prekršitelj predstavljao u trenutku počinjenog prekršaja.

Član 7.

Kodeks stupa na snagu danom donošenja.